

Na osnovu člana 61. stav (2) Zakona o upravi ("Službeni glasnik BiH", br. 32/02, 102/09), člana 11. stav (1), tačka e) Okvirnog zakona o osnovama naučnoistraživačke djelatnosti i koordinaciji unutrašnje i međunarodne naučnoistraživačke saradnje Bosne i Hercegovine "Službeni glasnik BiH", broj 43/9), ministar civilnih poslova, na prijedlog Vijeća za nauku Bosne i Hercegovine, donosi

## PRAVILNIK

### O NAGRADAMA U OBLASTI NAUKE U BOSNI I HERCEGOVINI ZA USPJEHE NA MEĐUNARODNOM PLANU

#### Član 1. (Predmet)

Ovim pravilnikom utvrđuje se način dodjele Nagrade za izuzetne uspjehe na međunarodnom planu u oblasti nauke u Bosni i Hercegovini (u daljem tekstu: Nagrada za nauku), način raspisivanja javnog konkursa za dodjelu Nagrade za nauku (u daljem tekstu: konkurs), način predlaganja naučnog radnika ili naučnoistraživačke organizacije/institucije za Nagradu za nauku (u daljem tekstu: kandidat), postupak za dodjelu Nagrade za nauku, oblik Nagrade za nauku i druga pitanja značajna za dodjelu Nagrade za nauku.

#### Član 2. (Dodjeljivanje Nagrade za nauku)

- (1) Nagrada za nauku dodjeljuje se u obliku plakete i novčane nagrade.
- (2) Nagrada za nauku dodjeljuje se jednom godišnje.
- (3) Nagrada za nauku se može kandidatu dodijeliti samo jednom.

#### Član 3. (Odlučivanje o dodjeli Nagrade za nauku)

- (1) Vijeće za nauku Bosne i Hercegovine (u daljem tekstu: Vijeće) na posebnim sjednicama razmatra pristigle prijedloge i utvrđuje konačan prijedlog za dodjelu Nagrade za nauku.
- (2) Vijeće utvrđuje konačan prijedlog za dodjelu Nagrade za nauku, u skladu s odredbama člana 7. ovog pravilnika konsenzusom.

## **Član 4.**

### **(Konkurs za dodjelu Nagrade za nauku)**

(1) Konkurs za dodjelu Nagrade za nauku raspisuje Ministarstvo civilnih poslova Bosne i Hercegovine (u daljem tekstu: Ministarstvo).

(2) Konkurs se objavljuje svake godine, najkasnije do kraja juna mjeseca, u najmanje tri dnevna lista u Bosni i Hercegovini i internet stranici Ministarstva, internet stranicama ministarstava nadležnih za nauku u Federaciji Bosne i Hercegovine i Republici Srpskoj (u daljem tekstu: ministarstva nadležna za nauku) i internet stranici Vlade Brčko Distrikta, kao i u "Službenom glasniku BiH", a traje 30 dana od dana objavlјivanja u "Službenom glasniku BiH".

(3) U konkursu se objavljuje postupak predlaganja kandidata i rok za podnošenje prijedloga za dodjelu Nagrade za nauku (u daljem tekstu: prijedlog).

## **Član 5.**

### **(Prijedlog za dodjelu Nagrade za nauku)**

(1) Pravo da podnesu prijedlog za dodjelu Nagrade za nauku imaju: akademije nauka i umjetnosti, univerziteti, naučnoistraživački instituti, kao i pojedinci, preko ministarstava nadležnih za nauku i Vlade Brčko Distrikta Bosne i Hercegovine.

(2) Jedan predlagač može dostaviti prijedlog samo jednog kandidata.

(3) Prijedlog za dodjelu Nagrade za nauku dostavlja se sa pisanim obrazloženjem.

(4) Uz pisano obrazloženje dostavljaju se sljedeća dokumenta: biografija kandidata, uvjerenje o državljanstvu kandidata, rješenje o registraciji (ako se radi o instituciji), podatke o djelatnosti kandidata i ostvarenjima i dostignućima u nauci i istraživanju na međunarodnom planu.

(5) Uz prijedlog, predlagač dostavlja originale ili ovjerene kopije dokumenata iz kojih se vide postignuti rezultati.

(6) Prijedlog se neće uzeti u razmatranje ako:

- a) dokumentacija nije potpuna,
- b) prijedlog nema obrazloženja,
- c) predlagač dostavi prijedlog za više kandidata.

## **Član 6.**

### **(Rokovi)**

(1) Ministarstvo prijedloge dostavlja Vijeću najkasnije 20 dana od dana zatvaranja konkursa.

- (2) Prijedloge pristigle poslije isteka roka konkursa Vijeće neće razmatrati.
- (3) Vijeće će u roku od 90 dana od dana prijema prijedloga utvrditi konačan prijedlog o dodjeli Nagrade za nauku i isti dostaviti ministru.

## Član 7. (Vrednovanje naučnih rezultata kandidata)

- 1) Nagrada za nauku dodjeljuje se naučnom radniku državljaninu Bosne i Hercegovine ili naučnoistraživačkoj instituciji iz Bosne i Hercegovine za izuzetno uspješan rad u oblasti nauke i izuzetno ostvareni rezultat/e na međunarodnom planu, pri čemu se uzima u obzir izuzetno naučno ostvarenje, te doprinos razvoju i popularizaciji nauke i prezentiranju Bosne i Hercegovine na međunarodnom planu.
- 2) Prilikom razmatranja pristiglih prijedloga, a u skladu sa Uputstvom o metodološkom okviru i principima za izradu pravilnika o minimalnim uvjetima za izbor u naučna zvanja („Službeni glasnik BiH“, broj 47/12), vrednovat će se:
  - a) Monografije, monografske studije, tematski zbornici, leksikografske i kartografske publikacije međunarodnog značaja;
  - (b) Radovi objavljeni u naučnim časopisima međunarodnog značaja;
  - (c) Zbornici međunarodnih naučnih skupova;
  - (d) Patenti, autorske izložbe, rukovođenje projektima, mentorstvo (na međunarodnom nivou).

## Član 8. (Način objave i dodjele Nagrade za nauku)

- (1) Rješenje o dodjeli Nagrade za nauku donosi ministar civilnih poslova na osnovu konačnog prijedloga Vijeća.
- (2) Ministar dodjeljuje Nagradu za nauku na posebnoj svečanoj sjednici.

## Član 9. (Oblik Nagrade za nauku)

- (1) Plaketa je u crnom kožnom omotu, dimenzija 31x22 cm. Na koricama omota utisnut je grb Bosne i Hercegovine i natpis Nagrada za nauku Bosne i Hercegovine ispisana na službenim jezicima u Bosni Hercegovini, cirilicom i latinicom, zlatno-žutom bojom. Na plaketi je žig Ministarstva civilnih poslova Bosne i Hercegovine i potpis ministra civilnih poslova Bosne i Hercegovine.
- (2) Visina novčane nagrade za nauku iznosi deset prosječnih plaća u Bosni i Hercegovini iz prethodne godine.

## **Član 10. (Posebne okolnosti)**

Ukoliko u budžetu Ministarstva civilnih poslova BiH za tekuću godinu nisu obezbjeđena novčana sredstva za Nagradu za nauku, konkurs za nagradu u toj godini se ne objavljuje i nagrada se ne dodjeljuje.

## **Član 11 (Stupanje na snagu)**

- (1) Pravilnik o dodjeli nagrade za nauku stupa na snagu narednog dana od dana objavlјivanja u "Službenom glasniku BiH".
- (2) Stupanjem na snagu ovog Pravilnika prestaje da važi Pravilnik o nagradama u oblasti nauke u Bosni i Hercegovini za uspjehe na međunarodnom planu ("Službeni glasnik BiH", broj 87/16).

Broj: 10-33-11-991/18

Sarajevo, 18.04. 2018. god.

